






E creacion di e statua di Anna Frank ta un berdadero obra di amor



ORANJESTAD (AAN): Manera a worde anuncia anteriormente. Fundacion RESPETA BIDA...sempre corda, Aruba pronto lo tin su mesun estatua pa conmemora e bida di Anna Frank, den curason di Wilhelmina Park.

Como su prome proyecto grandi, e fundacion a pidi e artista Hulandes Joep Coppens, kende ta specialisa den obranan di brons, pa crea e estatua di Anna Frank. E fundacion a scohe Anne Frank como un simbolo conmemorativo pa semper corda cu un holocaust por pasa atrobe, si un comunidad no sa con pa co-existi den paz.




E estatua a worde traha na Vliet, un pueblo chikito na Hulanda, unda e artista tin su studio. E creacion di e estatua a tuma algun luna, ya cu e ta consisti di shete etapa

principal. E proceso cu ta worde uza pa Coppens pa crea estatuanan y esculturanan di brons awendia ta e mesun proceso cu a worde uza den temponan anciano. Coppens a basa su trabao riba un modelo mas chikito, cual ta muestra Anne Frank sin sapato y para firme, cu su mannan mara y su cabes atras, cu bista pa e shelo. Na prome luga e mester a traha un estatua positivo, for di cual e por a traha "moldnan" negativo di e cabes, curpa, brasanan y pianan. For di e "moldnan" aki e por a traha replicanan hol di wax, cualnan despues a worde cubri den varios laag di un cascá cerámico y seca den forno. Unabes cu nan a keda cla, e brons likido a worde keinta te

ora cu el a yega un temperatura di 2200 grado y a worde basha den e cascanan y permiti pa fria. Ora e piesanan individual di brons a keda cla, nan a weld nan na otro, pa asina forma e estatua di Anna Frank.

E estatua lo worde desvela durante e bahada di solo riba dia 12 di Juni, cual ta e aniversario di e cumpleaños di Anna Frank. Coppens mes lo ta presente pa yuda cu e desvelo. Henter e comunidad ta invita tambe pa bin y participa den e ceremonia. Fundacion RESPETA BIDA...sempre corda a worde funda pa salvaguardia derechonan di cada miembro di e sociedad Arubano; promove tolerancia, solidaridat, libertad y igualdad di cada con-ciudadano; y lucha particularmente contra practicanan di: racismo, anti-semitismo y xenofobia, cu por



lanta cabes atrobe. E prome hunta di directiva di e fundacion ta consisti di: Señora Diana Gonzalez-Pieters como presidente y Sr. Jose Fernandes Perna, vicepresidente; Señora Martha Goldenberg-Lichtenstein como secretaria y Sr. Frank Williams, segundo secretario y Señora Shereen de Cuba como tesorero. E portretan ta muestra e proceso tras di e creacion di e estatua di Anna Frank.